

Na osnovu člana 169. stav (2) Zakona o autorskom i srodnim pravima ("Službeni glasnik BiH", broj 63/10) i člana 17. Zakona o Vijeću ministara Bosne i Hercegovine ("Službeni glasnik BiH", br. 30/03, 42/03, 81/06, 76/07, 81/07, 94/07 i 24/08), Vijeće ministara Bosne i Hercegovine, na prijedlog Uprave za indirektno oporezivanje, na 2. sjednici održanoj 23.02.2012. godine, donijelo je

ODLUKU

O PROVOĐENJU CARINSKIH MJERA ZA ZAŠTITU PRAVA NOSIOCA AUTORSKOG I SRODNIH PRAVA GLAVA I. OPĆE ODREDBE

Član 1.

(Predmet)

- (1) Ovom Odlukom bliže se propisuje postupak provođenja carinskih mjera koje Uprava za indirektno oporezivanje (u daljnjem tekstu: UIO) preduzima:
 - a) u vezi sa robom koja je predmet carinskog postupanja pri uvozu, tranzitu ili izvozu, a za koju postoji osnovana sumnja da se njome povređuju isključiva prava propisana Zakonom o autorskom i srodnim pravima ("Službeni glasnik BiH", broj 63/10) (u daljnjem tekstu: povreda autorskog ili srodnih prava), kao prava intelektualne svojine,
 - b) u vezi sa robom iz tačke a) ovog stava za koju je pravosnažnom odlukom nadležnog suda utvrđeno da povređuje autorsko ili srodna prava.
- (2) Carinske mjere za zaštitu prava zbog povrede autorskog ili srodnih prava u vezi sa robom iz stava (1) tačka a) ovog člana preduzimaju se u sljedećim carinski odobrenim postupanjima ili upotrebi (u daljnjem tekstu: carinski postupak):
 - a) kada je roba prijavljena za carinski postupak: provoza, stavljanja u slobodan promet, carinsko skladištenje, unutrašnju obradu, obradu pod carinskom kontrolom, vanjsku obradu i privremeni uvoz,
 - b) kada je roba prijavljena za izvoz ili ponovni izvoz,
 - c) kada se u provođenju mjera carinskog nadzora u skladu sa carinskim propisima pronađe roba koja se unosi u ili iznosi iz carinskog područja Bosne i Hercegovine,
 - d) kada se roba smješta u slobodnu zonu ili slobodno skladište.

Član 2.

(Roba kojom se povređuje autorsko ili srodna prava)

U svrhu primjene ove Odluke, roba kojom se povređuje autorsko ili srodna prava smatra se roba koja je proizvedena suprotno odredbama Zakona o autorskom i srodnim pravima.

Član 3.

(Izuzeće od primjene)

Ova Odluka, u skladu sa članom 168. stav (4) Zakona o autorskom i srodnim pravima, ne primjenjuje se na uvoz, tranzit ili izvoz robe u malim količinama namijenjenim za privatnu i nekomercijalnu upotrebu, koje se unose ili iznose kao dio ličnog prtljaga ili šalju u malim pošiljkama.

GLAVA II. ZAHTJEV I ODOBRENJE ZA PREDUZIMANJE CARINSKIH MJERA ZA ZAŠTITU PRAVA ZBOG POVREDE AUTORSKOG ILI SRODNIH PRAVA

Član 4.

(Lice koje može tražiti preduzimanje carinskih mjera i zastupanje)

- (1) Preduzimanje carinskih mjera za zaštitu prava zbog povrede autorskog ili srodnih prava može tražiti i to:
 - a) nosilac autorskog ili srodnog prava:

- 1) lice koje je, prema Zakonu o autorskom i srodnim pravima, izvorni nosilac autorskog ili srodnog prava i
 - 2) lice na koje je, u skladu sa Zakonom o autorskom i srodnim pravima, nasljeđivanjem, ugovorom ili drugim pravnim poslom preneseno autorsko ili srodno pravo, i to za vrijeme i obim tih prava u kojem su na njega prenesena,
- b) kolektivna organizacija (organizacija za kolektivno ostvarivanje autorskog i srodnih prava uređena Zakonom o kolektivnom ostvarivanju autorskog i srodnih prava ("Službeni glasnik BiH", broj 63/10) - u slučajevima u kojima, prema tom zakonu i Zakonu o autorskom i srodnim pravima, može imati aktivnu legitimaciju za ostvarivanje carinske zaštite prava priznatih Zakonom o autorskom i srodnim pravima,
 - c) strani autori i nosioci srodnih prava (stranci) koji uživaju zaštitu prema Zakonu o autorskom i srodnim pravima.
- (2) Lice (fizičko ili pravno) iz stava (1) ovog člana (u daljnjem tekstu: nosilac prava), u postupku carinske zaštite prava zbog povrede autorskog ili srodnih prava u skladu sa odredbama ove Odluke, može istupati samostalno ili putem zastupnika.

Član 5.

(Zahtjev za preduzimanje carinskih mjera za zaštitu prava zbog povrede autorskog ili srodnih prava)

- (1) Zahtjev za preduzimanje carinskih mjera za zaštitu prava zbog povrede autorskog ili srodnih prava (u daljnjem tekstu: zahtjev) podnosi se Središnjem uredu UIO (u daljnjem tekstu: Središnji ured) u pismenom obliku ili tehnikom obrade podataka (elektronskom razmjenom podataka) ako to dopuštaju tehničke mogućnosti i ako upotrebu takvog sistema odobri UIO. Na podnošenje zahtjeva putem tehnike obrade podataka, na odgovarajući način primjenjuju se odredbe carinskih propisa koje uređuju upotrebu sistema tehnike obrade podataka.
- (2) Zahtjev se podnosi u dva primjerka, na obrascu iz Priloga 1., koji je sastavni dio ove Odluke. Zahtjev mora da sadrži sve potrebne podatke, kako bi se omogućilo da roba koja je u pitanju odmah bude prepoznata od strane carinskog organa, a naročito sljedeće:
 - a) podatke o podnosiocu zahtjeva i o nosiocu prava, ako se ne radi o istom licu,
 - b) tačan i detaljan opis robe, koji carinskom organu omogućava njenu identifikaciju,
 - c) dokaz o tome da je podnosilac zahtjeva, odnosno lice koje je on ovlastio nosilac prava u vezi s odnosnom robom,
 - d) dokaz o tome da je pravo vjerovatno povrijeđeno,
 - e) ime i adresu kontakt osobe koju je odredio nosilac prava,
 - f) sve informacije koje nosilac prava može imati, a koje su specifične za vrstu ili način povrede njegovog prava,
 - g) vremenski period u kojem se zahtijeva preduzimanje carinskih mjera,
 - h) druge raspoložive podatke koji su poznati nosiocu prava, kao što su:
 - 1) vrijednost originalne robe prije oporezivanja na legalnom tržištu u Bosni i Hercegovini,
 - 2) podaci o lokaciji robe i njenoj destinaciji,
 - 3) podaci za identifikaciju pošiljke ili pakovanja i ambalaže robe,
 - 4) podaci o carinskom organu kojem će, prema očekivanju, roba biti dopremljena (predočena),
 - 5) očekivani datum dolaska ili odlaska pošiljke,

- 6) podaci o sredstvu transporta,
 - 7) podaci o uvozniku, izvozniku, primaocu ili licu koje je ovlašteno za raspolaganje robom,
 - 8) zemlja ili zemlje proizvodnje, te putevi prijevoza,
 - 9) tehničke i druge razlike između originalne i robe za koju se sumnja da povređuje autorsko ili srodna prava.
- (3) Uz zahtjev se prilaže dokaz da je podnositelj zahtjeva nosilac prava i druga potrebna dokumenta, i to kada zahtjev podnosi:
- a) nosilac autorskog ili srodnog prava iz člana 4. stav (1) tačka a) alineja 1) ove Odluke:
 - 1) ako je autorsko djelo ili predmet srodnog prava deponovano kod Instituta za intelektualnu svojinu Bosne i Hercegovine: isprava o deponovanju i upisu odnosno djela ili predmeta srodnog prava u knjigu evidencije autorskih djela koju vodi Institut za intelektualnu svojinu Bosne i Hercegovine i izjava iz člana 6. stav (1) ove Odluke,
 - 2) ako autorsko djelo ili predmet srodnog prava nije deponovano kod Instituta za intelektualnu svojinu Bosne i Hercegovine: dokaz o autorstvu ili statusu izvornog nosioca odnosno prava i izjava iz člana 6. stav (1) ove Odluke,
 - b) nosilac autorskog ili srodnog prava iz člana 4. stav (1) tačka a) alineja 2) ove Odluke: ovisno od načina prenošenja autorskog ili srodnog prava, pravosnažna sudska odluka o nasljeđivanju autorskog ili srodnog prava, ugovor ili druga odgovarajuća isprava o prijenosu autorskog ili srodnog prava kojom stiže pravo iskorišćavanja odnosno prava ovjerena kod notara i izjava iz člana 6. stav (1) ove Odluke,
 - c) kolektivna organizacija iz člana 4. stav (1) tačka b) ove Odluke: dozvola Instituta za intelektualnu svojinu Bosne i Hercegovine za obavljanje djelatnosti kolektivnog ostvarivanja autorskog ili srodnog prava, ugovor sa autorom ili nosiocem srodnog prava za kolektivno ostvarivanje njegovog autorskog ili srodnog prava ili odobrenje Instituta za intelektualnu svojinu Bosne i Hercegovine za kolektivno ostvarivanje autorskog ili srodnog prava, ovisno da li je kolektivno ostvarivanje autorskog ili srodnih prava preneseno na nadležnu kolektivnu organizaciju ugovorom ili na osnovu Zakona o kolektivnom ostvarivanju autorskog i srodnih prava (član 4., 5., i 9. tog zakona) i izjava iz člana 6. stav (1) ove Odluke,
 - d) strani autor ili nosilac srodnog prava iz člana 4. stav (1) tačka c) ove Odluke: odgovarajuće se primjenjuje tačka a) do c) ovog stava, ovisno od situacije.
- (4) Ako zahtjev u ime nosioca prava iz stava (3) ovog člana podnosi njegov zastupnik, uz zahtjev se mora priložiti i punomoć o zastupanju u postupku carinske zaštite, koja mora biti ovjerena kod notara, osim u slučaju kada je zastupnik advokat. Ako je u pitanju zastupanje nosioca prava iz stava (3) tačka d) ovog člana, uz zahtjev se podnosi i izjava zastupnika iz člana 6. stav (3) ove Odluke.
- (5) Od podnosioca zahtjeva, ovisno od situacije, mogu se zatražiti i dodatni podaci, uključujući i podatke o mjestu izrade ili proizvodnje robe, distribucijskoj mreži i korisnicima licencij.
- (6) Uz zahtjev se može dostaviti i uzorak robe koja je predmet povrede autorskog ili srodnih prava, kao i uzorak originalne robe, fotografije i slično.

Član 6.

(Izjava nosioca prava)

- (1) Uz zahtjev se podnosi izjava nosioca prava koji je podnio zahtjev, ovjerena kod notara. Izjavom, nosilac prava, prihvata odgovornost za štetu koja može nastati licima koja učestvuju u nekom od carinskih postupaka navedenih u članu 1. stav (2) ove Odluke, u slučaju kada su carinske mjere koje su preduzete u skladu sa odredbama ove Odluke prekinute usljed postupanja ili propusta nosioca prava, ili ako se za odnosnu robu utvrdi da ne povređuje pravo (autorsko ili srodno pravo).
- (2) Izjavom iz stava (1) ovog člana, nosilac prava se obavezuje da će snositi i sve troškove koji nastanu u vezi sa smještajem, čuvanjem i održavanjem robe za koju su preduzete carinske mjere za zaštitu prava zbog povrede autorskog ili srodnih prava u skladu sa odredbama ove Odluke, kao i druge troškove koji mogu nastati u skladu sa odredbama ove Odluke.
- (3) Ako zahtjev u ime nosioca prava iz člana 5. stav (3) tačka d) ove Odluke podnosi njegov zastupnik, izjava iz stava (1) ovog člana, mora da sadrži i klauzulu kojom taj nosilac prava na zastupnika prenosi obavezu plaćanja svih troškova koji proizilaze iz preduzimanja carinskih mjera u skladu sa odredbama ove Odluke u njegovo ime. U tom slučaju, uz zahtjev mora biti priložena i izjava zastupnika navedenog nosioca prava, ovjerena kod notara, kojom zastupnik, u ime zastupanog nosioca prava, preuzima obavezu plaćanja svih troškova koji proizilaze iz preduzimanja carinskih mjera u skladu sa odredbama ove Odluke.
- (4) Izjava nosioca prava iz stava (1) ovog člana podnosi se na obrascu iz Priloga 2., a izjava zastupnika nosioca prava iz stava (3) ovog člana na obrascu iz Priloga 3., a koji prilozi su sastavni dio ove Odluke.

Član 7.

(Postupanje po zahtjevu)

- (1) Ako podnijeti zahtjev sadrži sve podatke i isprave propisane čl. 5. i 6. ove Odluke, odnosno ispunjava uvjete, Središnji ured odobrava provođenje zatraženih carinskih mjera za zaštitu prava zbog povrede autorskog ili srodnih prava (odobrava zahtjev), o čemu, u skraćenom postupku, u vidu zabilješke na obrascu podnijetog zahtjeva (u oba primjerka), donosi rješenje, nakon čega jedan primjerak dostavlja podnosiocu zahtjeva.
- (2) Vremenski period na koji se, po zahtjevu nosioca prava, može odobriti provođenje carinskih mjera za zaštitu prava zbog povrede autorskog ili srodnih prava, shodno članu 166. stav (2) tačka f) Zakona o autorskom i srodnim pravima, ne može biti duži od dvije godine od dana podnošenja zahtjeva.
- (3) U slučaju odbijanja zahtjeva, Središnji ured o tome donosi rješenje u pismenom obliku.
- (4) U slučaju prestanka autorskog ili srodnog prava ili drugih promjena, nosilac prava obavezan je o promjeni obavijestiti Središnji ured, u roku od osam radnih dana od dana nastanka promjene.
- (5) Nosilac prava dužan je dostaviti sve dodatne podatke potrebne za preduzimanje carinskih mjera za zaštitu prava zbog povrede autorskog ili srodnih prava.
- (6) U smislu ove Odluke kao radni dan smatra se radna nedjelja od ponedjeljka do petka.

GLAVA III. PREDUZIMANJE CARINSKIH MJERA ZA ZAŠTITU PRAVA ZBOG POVREDE AUTORSKOG ILI SRODNIH PRAVA PO ODOBRENOM ZAHTJEVU NOSIOCA PRAVA

Član 8.

(Privremeno zadržavanje robe po zahtjevu nosioca prava)

- (1) Ako carinski organ, pri provođenju mjera carinskog nadzora ili provjere robe, odnosno provođenju carinskog postupka iz člana 1. stav (2) ove Odluke, identifikuje robu koja odgovara opisu robe navedenom u rješenju iz člana 7. stav (1) ove Odluke (rješenje na obrascu podnijetog zahtjeva) a za koju postoji osnovana sumnja da se njome povređuje autorsko ili srodna prava, po potrebi i uz konsultacije sa nosiocem prava, privremeno će prekinuti dalje provođenje zahtijevanog carinskog postupka i obustaviti puštanje odnosne robe, o čemu će, bez odlaganja, obavijestiti Središnji ured.
- (2) Nakon izvršenog pregleda robe iz stava (1) ovog člana i sastavljanja zapisnika o utvrđenom stanju, nadležni carinski organ dostavlja Središnjem uredu pismenu obavijest o toj robi.
- (3) Na osnovu obavijesti iz stava (2) ovog člana, a shodno članu 167. stav (1) Zakona o autorskom i srodnim pravima, Središnji ured, odmah, u pismenom obliku, donosi rješenje o prekidu zahtijevanog carinskog postupka i privremenom zadržavanju robe do okončanja postupka privremenog zadržavanja robe u skladu sa članom 11. ove Odluke. Rješenje se odmah dostavlja nosiocu prava, uvozniku (licu na koje glase robna dokumenta) i carinskom organu koji, na osnovu rješenja, privremeno zadržava odnosnu robu.
- (4) U rješenju iz stava (3) ovog člana navodi se naziv prava za koje se smatra da je povrijeđeno, stvarna ili pretpostavljena vrsta robe, stvarna ili procijenjena količina robe, zatim da se uvoznik robe, u roku od deset radnih dana od dana privremenog zadržavanja robe, može pismeno izjasniti o tome da li se radi o falsifikovanoj robi, odnosno drugoj povredi prava u vezi autorskog ili srodnih prava ili ne, te obaveza nosiocu prava da, u roku iz člana 10. ove Odluke, podnese dokaz o podnijetoj tužbi za utvrđivanje povrede autorskog ili srodnih prava ili pismenu izjavu uvoznika iz člana 14. stav (3) tačka b) ove Odluke.
- (5) Ako uvoznik robe, u roku iz stava (4) ovog člana, ne dostavi Središnjem uredu pismenu izjavu (u dva primjerka) o tome da li se radi o falsifikovanoj robi, odnosno drugoj povredi prava u vezi autorskog ili srodnih prava ili ne, roba se, na zahtjev nosioca prava, može uništiti u skladu sa članom 14. ove Odluke.
- (6) Kada uvoznik robe, u roku iz stava (4) ovog člana, dostavi Središnjem uredu pismenu izjavu o tome da li se radi o falsifikovanoj robi, odnosno drugoj povredi prava u vezi autorskog ili srodnih prava ili ne, Središnji ured odmah o zaprimljenoj izjavi obavještava nosioca prava, uz koju obavijest dostavlja zaprimljenu izjavu. Ukoliko, u roku iz stava (4) ovog člana, Središnji ured ne primi pismenu izjavu uvoznika robe o tome da li se robom povređuje autorsko ili srodna prava ili ne, o tome, po proteku tri radna dana od isteka navedenog roka, obavještava nosioca prava.
- (7) U svrhe iz stava (1) ovog člana i člana 7. ove Odluke, uz poštivanje propisa koji se odnose na zaštitu podataka i obavezu čuvanja profesionalne tajne, nadležna organizaciona jedinica UIO ovlaštena je na provođenje svih propisanih radnji iz djelokruga svoga rada koje su usmjerene na potvrđivanje elemenata opravdanosti sumnje

u povredu autorskog ili srodnih prava, što između ostalog, uključuje provođenje konsultacija sa predstavnikom nosioca prava (u pravilu sa osobom zaduženom za tehnička i administrativna pitanja iz zahtjeva, osobe iz polja 6. i 7. zahtjeva), uz provjeru određenih podataka uvidom u evidencije kojima raspolaže (*on-line* dostupne baze podataka Instituta za intelektualnu svojinu Bosne i Hercegovine i drugo).

Član 9.

(Postupanje u vezi sa privremeno zadržanom robom)

- (1) Carinski organ koji je, na osnovu rješenja iz člana 8. stav (3) ove Odluke, privremeno zadržao robu, na zahtjev i o trošku nosioca prava ili lica koje on ovlasti i uvoznika robe, omogućit će pod carinskim nadzorom pregled robe koja je privremeno zadržana po rješenju, fotografiranje i uvid u podnesene isprave o unosu robe u carinsko područje Bosne i Hercegovine ili iznosu robe iz tog područja, u obimu koji je potreban za utvrđivanje njihovih zahtjeva i za ostvarivanje sudske zaštite njihovih prava, uz obezbjeđenje zaštite povjerljivih podataka.
- (2) Prilikom pregleda privremeno zadržane robe, carinski organ će, na izričit zahtjev nosioca prava, a isključivo u svrhe analize, te da bi se olakšao daljnji postupak, uzeti uzorke te robe i predati ih nosiocu prava. Analiza uzetih uzoraka provodi se pod isključivom odgovornošću i o trošku nosioca prava. Ako to okolnosti dopuštaju i zavisno o primjeni člana 14. ove Odluke, uzorci se moraju vratiti nakon završene analize, po mogućnosti prije nego što se privremeno zadržana roba pusti u zahtijevani carinski postupak. Primjerak zapisnika o uzimanju uzoraka, carinski organ uručuje nosiocu prava. Uz zapisnik o uzimanju uzoraka obavezno se prilažu fotografije odnosne robe, na čiju poledinu se upisuje datum i vrijeme uzimanja uzoraka, broj i datum rješenja iz stava (1) ovog člana, šifra i potpis postupajućeg carinskog službenika i stavlja otisak službenog pečata.
- (3) Ako je samo za jedan dio prijavljene robe postojala opravdana sumnja da povređuje autorsko ili srodna prava i donijeto je rješenje o privremenom zadržavanju te robe, za ostatak pošiljke se, u skladu sa carinskim propisima, provodi zahtijevani carinski postupak.
- (4) Ako nosilac prava, u roku iz člana 10. ove Odluke, ne podnese dokaz o pokrenutom sudskom postupku za utvrđivanje povrede autorskog ili srodnih prava ili ne dođe do primjene člana 14. ove Odluke, nadležni carinski organ odobrava stavljanje privremeno zadržane robe u zahtijevani carinski postupak, uz ispunjenje uvjeta propisanih za stavljanje odnosne robe u taj postupak.
- (5) Središnji ured, uz poštivanje propisa koji se odnose na zaštitu podataka i obavezu čuvanja profesionalne tajne, obavijestit će nosioca prava, na njegov zahtjev i ako je poznato, o nazivu i adresi primaoca, pošiljaoca, te o porijeklu robe za koju se opravdano sumnja da povređuje autorsko ili srodna prava.
- (6) Nosilac prava koji je, shodno stavu (5) ovog člana, obaviješten smije koristiti tu obavijest, odnosno podatke iz te obavijesti samo u svrhu koja je određena čl. 10. i 14. ove Odluke. Ako drugim propisima nije drugačije propisano, svako korištenje obavijesti iz stava (5) ovog člana suprotno svrsi određenoj čl. 10. i 14. ove Odluke, može imati za posljedicu građanskopravnu odgovornost nosioca prava, te dovesti do ukidanja rješenja iz člana 7. stav (1) ove Odluke.

Član 10.

(Обавijest o podnošenju tužbe)

- (1) Nosilac prava obavezan je, u roku od deset radnih dana od dana prijema obavijesti iz člana 8. stav (6) ove Odluke, pismeno obavijestiti Središnji ured da je u vezi sa privremeno zadržanom robom nadležnom sudu podnio tužbu za utvrđivanje povrede autorskog ili srodnih prava, uz koju obavijest mora biti priložena kopija tužbe sa dokazom o njenom podnošenju sudu.
- (2) Ako posebne okolnosti to opravdavaju, Središnji ured može, na obrazloženi zahtjev nosioca prava, produžiti rok iz stava (1) ovog člana za daljih deset radnih dana. Zahtjev za produženje roka mora se podnijeti prije isteka roka iz stava (1) ovog člana.

GLAVA IV. OKONČANJE PRIVREMENOG ZADRŽAVANJA ROBE

Član 11.

(Način okončanja privremenog zadržavanja robe)

Postupak privremenog zadržavanja robe, koji je započeo donošenjem rješenja iz člana 8. stav (3) ove Odluke, okončava se (prestaje) na jedan od sljedećih načina:

- a) stavljanjem robe u zahtijevani carinski postupak, ako nosilac prava nije, u roku iz člana 10. ove Odluke, pokrenuo sudski postupak za utvrđivanje povrede autorskog ili srodnih prava, ili je u tom roku pismeno obavijestio Središnji ured da u vezi sa privremeno zadržanom robom ne namjerava preduzimati mjere shodno odredbama ove Odluke, ili nije došlo do primjene člana 14. ove Odluke,
- b) donošenjem Odluke o zapljeni robe do prijema pravosnažne Odluke nadležnog suda, u skladu sa članom 13. ove Odluke,
- c) uništenjem robe u skladu sa članom 14. ove Odluke.

Član 12.

(Stavljanje privremeno zadržane robe u zahtijevani carinski postupak)

Ako nosilac prava, u roku iz člana 10. ove Odluke, ne pokrene sudski postupak za utvrđivanje povrede autorskog ili srodnih prava ili je u tom roku pismeno obavijestio Središnji ured da u vezi sa privremeno zadržanom robom ne namjerava preduzimati mjere shodno odredbama ove Odluke ili ako ne pokrene postupak za uništenje robe u skladu sa članom 14. ove Odluke, prestaje privremeno zadržavanje robe. U tom slučaju, nadležni carinski organ, po dobijanju obavijesti o prestanku privremenog zadržavanja robe od Središnjeg ureda, odobrava stavljanje iste u zahtijevani carinski postupak na osnovu podnijete carinske prijave, uz ispunjenje uvjeta propisanih za stavljanje odnosne robe u taj postupak.

Član 13.

(Zapljenjena robe)

- (1) Ako nosilac prava postupi u skladu sa članom 10. ove Odluke, Središnji ured, u roku od pet radnih dana od prijema pismene obavijesti o podnošenju tužbe, sa kopijom tužbe i dokazom o njenom podnošenju sudu, donosi rješenje o zapljeni robe do prijema pravosnažne Odluke nadležnog suda. Rješenje se dostavlja nosiocu prava, uvozniku robe i carinskom organu koji je, na osnovu rješenja iz člana 8. stav (3) ove Odluke, privremeno zadržao odnosnu robu. Ukoliko je rješenjem zaplijenjena sva prijavljena roba, rješenjem se, ako je to potrebno, može poništiti podnijeta carinska prijava.
- (2) Robu zaplijenjenu po rješenju iz stava (1) ovog člana nosilac prava obavezan je, u roku od tri radna dana od dana prijema rješenja, o svom trošku, staviti u postupak carinskog skladištenja shodno važećim carinskim

propisima i izmiriti sve troškove nastale u vezi odnosne robe od momenta slanja obavijesti iz člana 8. stav (2) ove Odluke do njenog stavljanja u postupak carinskog skladištenja.

- (3) Ako nosilac prava robu zaplijenjenu po rješenju iz stava (1) ovog člana ne stavi u postupak carinskog skladištenja i ne izmiri troškove u roku iz stava (2) ovog člana, ili ako ispunji samo jedan od navedenih kumulativnih uvjeta, nadležni carinski organ odobrava stavljanje zaplijenjene robe u zahtijevani carinski postupak, uz ispunjenje ostalih uvjeta propisanih za stavljanje odnosne robe u taj postupak.
- (4) Pravosnažnu odluku koju je nadležni sud donio po tužbi nosioca prava za utvrđivanje povrede autorskog ili srodnih prava, nosilac prava obavezan je dostaviti Središnjem uredu u roku od osam radnih dana od prijema takve Odluke.
- (5) Ako pravosnažnom odlukom nadležnog suda nije utvrđena povreda autorskog ili srodnih prava, nadležni carinski organ odobrava stavljanje zaplijenjene robe u zahtijevani carinski postupak, radi čega, odmah po dobijanju navedene Odluke od Središnjeg ureda, pismeno obavještava uvoznika da robu može staviti u zahtijevani carinski postupak, uz ispunjenje ostalih uvjeta propisanih za stavljanje odnosne robe u taj postupak.
- (6) U slučaju iz stava (5) ovog člana, datum koji treba da se koristi s ciljem primjene svih propisa kojima se regulira carinski postupak za koji je, nakon pravosnažne Odluke suda, zaplijenjena roba prijavljena je datum prihvatanja carinske prijave za taj postupak od strane carinskog organa.

Član 14.

(Uništenje privremeno zadržane robe po zahtjevu nosioca prava)

- (1) Roba privremeno zadržana po rješenju iz člana 8. stav (3) ove Odluke za koju postoji osnovana sumnja da se njome povređuje autorsko ili srodna prava, može se, na zahtjev nosioca prava, u skladu sa članom 167. stav (2) Zakona o autorskom i srodnim pravima, oduzeti i uništiti pod carinskim nadzorom, bez obaveze da se prethodno u sudskom postupku utvrdi da li je povređeno autorsko ili srodna prava.
- (2) Uništenje privremeno zadržane robe, na zahtjev nosioca prava, može se odobriti pod sljedećim uvjetima:
 - a) da je nosilac prava, u roku iz člana 10. ove Odluke, pismeno obavijestio Središnji ured da roba povređuje autorsko ili srodna prava i da je uz tu obavijest dostavio pismenu izjavu uvoznika iz stava (3) tačka b) ovog člana,
 - b) da je uvoznik robe, u roku iz člana 8. stav (4) ove Odluke, dostavio Središnjem uredu pismenu izjavu o tome da se radi o povredi autorskog ili srodnih prava ili ako u tom roku ne dostavi pismenu izjavu.
- (3) Zahtjev za uništenje privremeno zadržane robe podnosi se Središnjem uredu, u roku iz člana 10. ove Odluke. Uz zahtjev, nosilac prava prilaže:
 - a) pismenu izjavu da se privremeno zadržanom robom povređuje autorsko ili srodna prava, ovjerenu kod notara,
 - b) pismenu izjavu uvoznika da je saglasan sa uništenjem privremeno zadržane robe, ovjerenu kod notara.
- (4) Smatra se da je suglasnost iz stava (3) tačka b) ovog člana data ako, u roku iz člana 8. stav (4) ove Odluke, uvoznik ne podnese prigovor protiv uništenja privremeno zadržane robe.

- (5) Ako uvoznik robe, u roku iz člana 8. stav (4) ove Odluke, Središnjem uredu podnese pismenu izjavu o tome da se ne radi o povredi autorskog ili srodnih prava, smatra se da nisu ispunjeni uslovi za uništenje privremeno zadržane robe u skladu sa ovim članom.
- (6) Rješenje po zahtjevu iz stava (3) ovog člana donosi Središnji ured i dostavlja ga podnosiocu zahtjeva, uvozniku robe i nadležnom carinskom organu.
- (7) Prije uništenja privremeno zadržane robe, nadležni carinski organ može, na zahtjev i o trošku nosioca prava ili lica koje on ovlasti i uvoznika robe, omogućiti uzimanje uzoraka predmetne robe u obimu koji je potreban kao dokaz u slučaju pokretanja sudskog postupka. Uzeti uzorci robe predaju se na čuvanje licu koje je tražilo uzimanje uzoraka, uz potvrdu prijema, kojem licu nadležni carinski organ uručuje i primjerak zapisnika o uzimanju uzoraka. Uz zapisnik o uzimanju uzoraka obavezno se prilažu fotografije odnosno robe, na čiju poleđinu se upisuje datum i vrijeme uzimanja uzoraka, broj i datum rješenja iz stava (6) ovog člana, šifra i potpis carinskog službenika i stavlja otisak službenog pečata.
- (8) Za uništenje privremeno zadržane robe odgovoran je nosilac prava, koji i organizuje i snosi troškove uništenja robe, što uključuje i pribavljanje svih suglasnosti ili dozvola nadležnih organa potrebnih za uništenje odnosno robe. O vremenu i mjestu uništenja privremeno zadržane robe, nosilac prava dužan je blagovremeno obavijestiti nadležni carinski organ, čiji carinski službenici prisustvuju uništenju robe.
- (9) O uništenju privremeno zadržane robe, nosilac prava ili lice koje uništava robu, sačinjava zapisnik kojeg potpisuje nosilac prava, carinski službenici i ostala lica koja prisustvuju uništenju robe. Jedan primjerak zapisnika, nosilac prava dužan je dostaviti i Središnjem uredu, najkasnije u roku od tri radna dana po izvršenom uništenju robe.
- (10) Uništenjem privremeno zadržane robe u skladu sa ovim članom ne smiju nastati troškovi na teret UIO, odnosno države Bosne i Hercegovine.

GLAVA V. POSTUPANJE SA ZAPLIJENJENOM ROBOM ZA KOJU JE UTVRĐENO DA POVREĐUJE AUTORSKO ILI SRODNA PRAVA

Član 15.

(Postupanje sa zaplijenjenom robom)

Roba zaplijenjena po rješenju iz člana 13. stav (1) ove Odluke za koju je, pravosnažnom odlukom nadležnog suda, utvrđeno da povređuje autorsko ili srodna prava ne može biti:

- a) puštena u slobodan promet,
- b) iznijeta iz carinskog područja Bosne i Hercegovine,
- c) izvezena, osim ako je uništenje robe neophodno obaviti u inostranstvu,
- d) ponovno izvezena, osim ako je uništenje robe neophodno obaviti u inostranstvu,
- e) stavljena u postupak obustave plaćanja ili postupak sa ekonomskim učinkom,
- f) smještena u slobodnu zonu ili slobodno skladište.

Član 16.

(Uništenje zaplijenjene robe)

- (1) Za zaplijenjenju robu iz člana 15. ove Odluke za koju je pravosnažnom odlukom nadležnog suda utvrđeno da povređuje autorsko ili srodna prava, Središnji ured, po službenoj dužnosti, donosi rješenje o njenom uništenju, ako iz sudske Odluke ne proizilazi drugačije.

- (2) Na postupak uništenja zaplijenjene robe iz stava (1) ovog člana odgovarajuće primjenjuje se član 14. stav (8) do (10) ove Odluke.

GLAVA VI. PREDUZIMANJE CARINSKIH MJERA ZA ZAŠTITU PRAVA ZBOG POVREDE AUTORSKOG ILI SRODNIH PRAVA PO SLUŽBENOJ DUŽNOSTI

Član 17.

(Pokretanje postupka po službenoj dužnosti)

- (1) Ako carinski organ, pri provođenju mjera carinskog nadzora ili provjere robe, odnosno provođenju carinskog postupka iz člana 1. stav (2) ove Odluke, a prije nego što je zahtjev iz člana 5. ove Odluke podnesen ili odobren, utvrdi postojanje osnovane sumnje da se predmetnom robom povređuje autorsko ili srodna prava, tada će, shodno članu 168. Zakona o autorskom i srodnim pravima, po službenoj dužnosti (*ex officio*) prekinuti dalje provođenje zahtijevanog carinskog postupka i privremeno zadržati puštanje robe na rok od pet radnih dana, o čemu će, bez odlaganja, obavijestiti Središnji ured.
- (2) Na osnovu obavijesti iz stava (1) ovog člana, a shodno članu 168. stav (2) Zakona o autorskom i srodnim pravima, Središnji ured će odmah, ako je poznat, obavijestiti nosioca prava o privremenom zadržavanju puštanja robe po službenoj dužnosti, o sumnji da se radi o povredi njegovog prava (autorskog ili srodnih prava), te da u roku od pet radnih dana od dana privremenog zadržavanja puštanja robe može podnijeti zahtjev iz člana 5. ove Odluke. Primjerak obavijesti Središnji ured dostavlja i uvozniku robe i nadležnom carinskom organu.
- (3) Ako Središnjem uredu nije poznat odnosni nosilac prava, o tome odmah obavještava nadležni carinski organ. Nadležni carinski organ, u tom slučaju, odobrava stavljanje zadržane robe u zahtijevani carinski postupak, radi čega, odmah pismeno obavještava uvoznika da robu može staviti u zahtijevani carinski postupak, uz ispunjenje ostalih uvjeta propisanih za stavljanje odnosno robe u taj postupak.

Član 18.

(Postupanje nosioca prava)

- (1) Ako nosilac prava, u roku iz člana 17. stav (2) ove Odluke, podnese zahtjev iz člana 5. ove Odluke, Središnji ured donosi rješenje o privremenom zadržavanju robe do donošenja rješenja po zahtjevu.
- (2) U rješenju iz stava (1) ovog člana navodi se naziv prava za koje se smatra da je povrijeđeno, stvarna ili pretpostavljena vrsta robe, stvarna ili procijenjena količina robe, zatim da se uvoznik robe, u roku od deset radnih dana od dana privremenog zadržavanja robe, može pismeno izjasniti o tome da li se radi o falsifikovanoj robi, odnosno drugoj povredi prava u vezi autorskog ili srodnih prava ili ne, te obaveza nosiocu prava, ako njegov zahtjev bude odobren, da u roku iz člana 10. ove Odluke, podnese dokaz o podnijetoj tužbi za utvrđivanje povrede autorskog ili srodnih prava ili pismenu izjavu uvoznika iz člana 14. stav (3) tačka b) ove Odluke.
- (3) Ako Središnji ured nosiocu prava odobri podnijeti zahtjev iz člana 5. ove Odluke, roba se, na osnovu rješenja iz stava (1) ovog člana, privremeno zadržava i za daljnjih deset radnih dana od dana donošenja rješenja po zahtjevu. U daljem postupku preduzimanja carinskih mjera za zaštitu prava zbog povrede autorskog ili srodnih prava po tom zahtjevu, primjenjuju se odredbe ove Odluke koje uređuju preduzimanje carinskih mjera za zaštitu prava zbog povrede autorskog ili srodnih prava po odobrenom zahtjevu nosioca prava.

- (4) Ako nosilac prava, u roku iz člana 17. stav (2) ove Odluke, ne podnese zahtjev iz člana 5. ove Odluke, Središnji ured nadležnom carinskom organu o tome dostavlja pismenu obavijest. Nadležni carinski organ, u tom slučaju, odobrava stavljanje zadržane robe u zahtijevani carinski postupak po podnesenoj carinskoj prijavi, uz ispunjenje ostalih uvjeta propisanih za stavljanje odnosne robe u taj postupak, o čemu odmah obavještava uvoznika robe.

GLAVA VII. TROŠKOVI I ŠTETA

Član 19.

(Troškovi i šteta)

- (1) Troškove i eventualnu štetu koja nastane u provođenju ove Odluke, ni u kom slučaju, ne snosi UIO, odnosno država Bosna i Hercegovina.
- (2) Nosilac prava nema pravo na naknadu štete od UIO, odnosno države Bosne i Hercegovine ni u slučaju da roba za koju je odobren njegov zahtjev iz člana 5. ove Odluke nije otkrivena od strane UIO, da je puštena ili da nije pokrenut postupak za njeno zadržavanje.

Član 20.

(Troškovi i šteta koju snosi nosilac prava)

- (1) Troškove i eventualnu štetu koja nastane u vezi sa robom za koju su preduzete carinske mjere u skladu sa ovom odlukom snosi nosilac prava, osim u slučaju iz člana 21. ove Odluke.
- (2) Primjena stava (1) ovog člana ne isključuje pravo nosioca prava da naknadu troškova i eventualne štete koju je snosio u skladu sa odredbama ove Odluke zahtijeva od lica za koje se utvrdi da je njegovom robom povrijeđeno autorsko ili srodna prava.

Član 21.

(Troškovi koje snosi uvoznik robe)

U slučaju iz člana 17. stav (3) i člana 18. stav (4) ove Odluke troškove snosi uvoznik robe.

GLAVA VIII. OSTALE ODREDBE

Član 22.

(Odnos prema drugim propisima i žalba)

- (1) Primjena odredaba ove Odluke ne isključuje primjenu drugih carinskih propisa koji uređuju provođenje mjera carinskog nadzora i provjere robe, odnosno provođenje carinskog postupka.
- (2) Ako odredbama Zakona o carinskoj politici Bosne i Hercegovine ("Službeni glasnik BiH", br. 57/04, 51/06, 93/08, 54/10 i 76/11) i odredbama ove Odluke nije drugačije propisano, na postupak po odredbama ove Odluke primjenjuju se odredbe Zakona o upravnom

postupku ("Službeni glasnik BiH", br. 29/02, 12/04, 88/07 i 93/09).

- (3) Žalba uložena na rješenje donijeto u provođenju ove Odluke, shodno članu 7. Zakona o carinskoj politici Bosne i Hercegovine, ne odlaže izvršenje tog rješenja.

Član 23.

(Evidencija i razmjena podataka)

- (1) UIO će, za potrebe primjene ove Odluke i izvještavanja, uspostaviti i voditi odgovarajuću evidenciju o zahtjevima nosioca prava iz člana 5. ove Odluke i o carinskim mjerama preduzetim u skladu sa ovom odlukom.
- (2) Institut za intelektualnu svojinu Bosne i Hercegovine ili drugi nadležni organ, za potrebe primjene ove Odluke, dužan je UIO dostaviti ili omogućiti pristup informacijama iz odgovarajućih evidencija koje vode u skladu sa Zakonom o autorskom i srodnim pravima.
- (3) UIO će, na zahtjev Instituta za intelektualnu svojinu Bosne i Hercegovine ili drugog nadležnog organa, dostaviti podatke o kojima vodi evidenciju u skladu sa stavom (1) ovog člana.

GLAVA IX. PRIJELAZNE I ZAVRŠNE ODREDBE

Član 24.

(Postupak za zaštitu prava zbog povrede autorskog ili srodnih prava koji je u toku i drugi postupak)

- (1) Postupak preduzimanja carinskih mjera u vezi sa robom kojom se povređuje autorsko ili srodna prava pokrenut do dana početka primjene Zakona o autorskom i srodnim pravima okončan će se prema propisima po kojima je pokrenut.
- (2) Na postupak preduzimanja carinskih mjera u vezi sa robom kojom se povređuje autorsko ili srodna prava pokrenut nakon početka primjene Zakona o autorskom i srodnim pravima a koji nije okončan do stupanja na snagu ove Odluke, primjenjuje se ova odluka.
- (3) Zahtjev za preduzimanje carinskih mjera za zaštitu prava zbog povrede autorskog ili srodnih prava podnesen prije stupanja na snagu ove Odluke po kojem do stupanja na snagu ove Odluke nije donijeto rješenje, smatra se kao da nije ni podnesen.

Član 25.

(Stupanje na snagu)

Ova Odluka stupa na snagu osmoga dana od dana objavljivanja u "Službenom glasniku BiH".

VM broj 60/12
23. februara 2012. godine
Sarajevo

Predsjedavajući
Vijeća ministara BiH
Vjekoslav Bevanda, s. r.

Prilog 1.

**ZAHTEJEV ZA PREDUZIMANJE CARINSKIH MJERA ZA ZAŠTITU
PRAVA ZBOG POVREDE AUTORSKOG ILI SRODNIH PRAVA**

1. Podaci o podnosiocu zahtjeva (nosilac prava u smislu člana 4. Odluke*)		2. Datum prijema zahtjeva				
Ime/Naziv		Dan/mjesec/godina: <table border="1" style="display: inline-table;"><tr><td style="width: 20px; height: 15px;"></td><td style="width: 20px; height: 15px;"></td><td style="width: 20px; height: 15px;"></td></tr></table>				
Funkcija		ZAHTEJEV ZA PREDUZIMANJE CARINSKIH MJERA ZA ZAŠTITU PRAVA ZBOG POVREDE AUTORSKOG ILI SRODNIH PRAVA				
Adresa						
Grad						
Poštanski broj						
Džava						
ID broj						
Telefon						
Mobilni telefon						
Fax broj						
E-mail adresa						
Internet adresa		3. Zahtjev upućen				
4. Status podnosioca zahtjeva (prema članu 4. Odluke)¹		BOSNA I HERCEGOVINA UPRAVA ZA INDIRECTNO OPOREZIVANJE SREDIŠNJI URED				
<input type="checkbox"/> Nosilac autorskog ili srodnog prava ² <input type="checkbox"/> Kolektivna organizacija ² <input type="checkbox"/> Strani autor ili nosilac srodnog prava ²		5. Podaci o zastupniku podnosioca zahtjeva (ako ga ima)**				
		Ime/ Naziv				
		Adresa				
		Grad				
		Poštanski broj				
		Telefon				
		Mobilni telefon				
		Fax broj				
		E-mail adresa				
		Internet adresa				
6. Ime i adresa kontakt osobe nosioca prava (administrativna pitanja)		7. Ime i adresa kontakt osobe nosioca prava (tehnička pitanja)				
Telefon		Telefon				
Mobilni telefon		Mobilni telefon				
Fax broj		Fax broj				
E-mail adresa		E-mail adresa				
Internet adresa		Internet adresa				
8. Priloženi tehnički podaci o originalnoj robi:						
<input type="checkbox"/> Broj priloženih isprava ³		<input type="checkbox"/> Broj priloženih fotografija ³				
9. Priloženi specifični podaci o vrsti ili načinu povrede prava:						
<input type="checkbox"/> Broj priloženih isprava ³		<input type="checkbox"/> Broj priloženih fotografija ³				
10. Priložene isprave koje potvrđuju da podnosilac zahtjeva ima pravo na podnošenje zahtjeva u smislu člana 4. Odluke***:		11. Priložena izjava u skladu sa članom 6. Odluke²				
<input type="checkbox"/> Broj priloženih isprava ³		<input type="checkbox"/> Izjava nosioca prava priložena				
		<input type="checkbox"/> Izjava zastupnika nosioca prava priložena				
12. Ostali podaci kojima nosilac prava raspolaže:						
Zemlja/zemlje proizvodnje		broj podnesenih isprava ³	<input type="checkbox"/>			
Putevi prijevoza		broj podnesenih isprava ³	<input type="checkbox"/>			
Tehničke razlike između originalne i robe za koju se sumnja da povređuje autorsko ili srodna prava:		broj podnesenih isprava ³	<input type="checkbox"/>			
Tarifna oznaka robe po CT:						

Ostale korisne informacije i prilozi:		broj podnesenih isprava ¹ <input type="checkbox"/>	
Period za koji se traži preduzimanje carinskih mjera: od do			
Sve priložene isprave uz zahtjev smataju se sastavnim dijelom zahtjeva.			
13. Datum popunjavanja obrasca zahtjeva			
Dan/mjesec/godina:		Mjesto:	Potpis i pečat podnosioca**
<input type="text"/> <input type="text"/> <input type="text"/>			
14. ODLUKA UPRAVE ZA INDIRECTNO OPOREZIVANJE			
<input type="checkbox"/> ZAHTJEV SE ODOBRAVA			
Broj rješenja:			
Dan/mjesec/godina:			
Mjesto:			
<input type="checkbox"/> Carinski organi postupat će po ovom zahtjevu do:			
Dan/mjesec/godina:			
		Potpis i pečat:	
<input type="checkbox"/> ZAHTJEV SE ODBIJA			
Broj rješenja o odbijanju zahtjeva:			
Dan/mjesec/godina rješenja:			
Prilaže se rješenje o odbijanju zahtjeva.			
Mjesto:		Potpis i pečat:	

¹ Označiti odgovarajuće polje.

² Pogledat polje 10 (za dodatne informacije pogledati Objašnjenje za popunjavanje obrasca zahtjeva za preduzimanje carinskih mjera za zaštitu prava zbog povrede autorskog ili srodnih prava).

³ Upisati odgovarajući broj (broj podnesenih isprava), ako nema priloga upisati "0".

⁴ Odluka o provođenju carinskih mjera za zaštitu prava nosioca autorskog i srodnih prava.

⁵ Ako nosilac prava podnosi zahtjev putem svog zastupnika, uz zahtjev mora biti priložena punomoć o zastupanju, ovjerena kod notara, osim u slučaju kada je zastupnik advokat.

⁶ Za dodatne informacije pogledati Objašnjenje za popunjavanje obrasca zahtjeva za preduzimanje carinskih mjera za zaštitu prava zbog povrede autorskog ili srodnih prava.

**OBJAŠNJENJE ZA POPUNJAVANJE OBRASCA ZAHTJEVA ZA PREDUZIMANJE
CARINSKIH MJERA ZA ZAŠTITU PRAVA ZBOG POVREDE AUTORSKOG ILI SRODNIH PRAVA**

I - OBAVEZNI PODACI

Uz zahtjev za preduzimanje carinskih mjera za zaštitu prava zbog povrede autorskog ili srodnih prava (dalje: zahtjev) prilaže se dokaz da je podnositelj zahtjeva nosilac prava i druga potrebna dokumenta, i to kada zahtjev podnosi:

- a) nosilac autorskog ili srodnog prava iz člana 4. stav (1) tačka a) alineja 1) Odluke o provođenju carinskih mjera za zaštitu prava nosioca autorskog i srodnih prava (dalje: Odluka):
 - 1) ako je autorsko djelo ili predmet srodnog prava deponovano kod Instituta za intelektualnu svojinu Bosne i Hercegovine: isprava o deponovanju i upisu odnosno djela ili predmeta srodnog prava u knjigu evidencije autorskih djela koju vodi Institut za intelektualnu svojinu Bosne i Hercegovine i izjava iz člana 6. stav (1) Odluke,
 - 2) ako autorsko djelo ili predmet srodnog prava nije deponovano kod Instituta za intelektualnu svojinu Bosne i Hercegovine: dokaz o autorstvu ili statusu izvornog nosioca odnosno prava i izjava iz člana 6. stav (1) Odluke,
- b) nosilac autorskog ili srodnog prava iz člana 4. stav (1) tačka a) alineja 2) Odluke: ovisno od načina prenošenja autorskog ili srodnog prava, pravosnažna sudska odluka o nasljeđivanju autorskog ili srodnog prava, ugovor ili druga odgovarajuća isprava o prenosu autorskog ili srodnog prava kojom stiče pravo iskorišćavanja odnosno prava ovjerena kod notara i izjava iz člana 6. stav (1) Odluke,
- c) kolektivna organizacija iz člana 4. stav (1) tačka b) Odluke: dozvola Instituta za intelektualnu svojinu Bosne i Hercegovine za obavljanje djelatnosti kolektivnog ostvarivanja autorskog ili srodnog prava, ugovor sa autorom ili nosiocem srodnog prava za kolektivno ostvarivanje njegovog autorskog ili srodnog prava ili odobrenje Instituta za intelektualnu svojinu Bosne i Hercegovine za kolektivno ostvarivanje autorskog ili srodnog prava, ovisno da li je kolektivno ostvarivanje autorskog ili srodnih prava preneseno na nadležnu kolektivnu organizaciju ugovorom ili na osnovu Zakona o kolektivnom ostvarivanju autorskog i srodnih prava (član 4., 5., i 9. tog zakona) i izjava iz člana 6. stav (1) Odluke,
- d) strani autor ili nosilac srodnog prava iz člana 4. stav (1) tačka c) Odluke: odgovarajuće se primjenjuje tačka a) do c) ovog stava, ovisno od situacije. Ako zahtjev u ime stranog autora ili nosioca srodnog prava podnosi njegov zastupnik, tada izjava tog nosioca prava mora da sadrži i klauzulu iz člana 6. stav (3) Odluke, a uz zahtjev se mora priložiti i izjava zastupnika iz člana 6. stav (3) Odluke i punomoć o zastupanju.

II - ŠTA MORA SADRŽAVATI ZAHTJEV

Nosilac prava može podnijeti zahtjev, bilo kao preventivnu mjeru ili ako ima razloga vjerovati da je njegovo isključivo pravo iz Zakona o autorskom i srodnim pravima povrijeđeno ili da će vjerovatno biti povrijeđeno. Zahtjev mora sadržavati sve potrebne informacije i podatke kako bi nadležni carinski organ mogao lako prepoznati odnosnu robu, a posebno:

- tačan i detaljan tehnički opis robe,
- ime i adresu kontakt osobe koja je odredio nosilac prava,
- sve specifične informacije koje nosilac prava može imati vezano za vrstu ili način povrede njegovog prava (autorskog ili srodnih prava),
- izjavu iz člana 6. Odluke i dokaz da je podnositelj zahtjeva nosilac prava u odnosu na predmetnu robu.

Zahtjev ne smije sadržavati greške, brisanja, precrtane riječi ili druge promjene.

Nosilac prava, obavezno i bez odlaganja, mora vratiti potvrdu (dokaz) o prijemu pismena koje mu dostavi Uprava za indirektno oporezivanje shodno odredbama Odluke (u slučaju postupanja na temelju zahtjeva nosioca prava ili *ex officio*).

U smislu Odluke, kao radni dan smatra se radna nedjelja od ponedjeljka do petka.

III - PODNOŠENJE ZAHTJEVA

Nosilac prava zahtjev podnosi Središnjem uredu Uprave za indirektno oporezivanje, u dva primjerka, taksiran propisanom administrativnom taksom. Rješenje po zahtjevu donosi se u roku od 30 dana od dana prijema urednog zahtjeva. Carinske mjere za zaštitu prava zbog povrede autorskog ili srodnih prava mogu se odobriti za period koji ne može biti duži od dvije godine od dana podnošenja zahtjeva.

IV - OBJAŠNJENJA ODREĐENIH POLJA KOJA POPUNJAVA PODNOSILAC ZAHTJEVA

Polje 1: Podaci o podnosiocu zahtjeva. Ko može tražiti preduzimanje carinskih mjera za zaštitu prava zbog povrede autorskog ili srodnih prava bliže je propisano članom 4. Odluke.

Polje 4: Status podnosioca zahtjeva (prema članu 4. Odluke). Označiti odgovarajuće polje.

Polje 6 i 7: U polje 6. unose se podaci o kontakt osobi podnosioca zahtjeva koja se bavi administrativnim pitanjima. Polje 7. namijenjeno je za podatke o osobi koja je odgovorna za kontakt sa Upravom za indirektno oporezivanje radi utvrđivanja tehničkih pojedinosti u pogledu zadržane robe. Osoba o kojoj je riječ mora biti lako dostupna u svako vrijeme.

Polja 8, 9 i 12: Polje 8. namijenjeno je za specifične i precizne podatke koji carinskom organu trebaju omogućiti pravilno prepoznavanje originalne robe, kao i za podatke koje nosilac prava može imati o vrsti i načinu povrede prava (isprave, fotografije, itd.). Podaci u zahtjevu trebaju biti što obuhvatniji, kako bi carinskom organu omogućili jednostavno i efikasno prepoznavanje sumnjivih pošiljki uz upotrebu sistema analize rizika.

U ova polja potrebno je upisati različite podatke radi obaviještenosti carinskog organa o robi i vrstama mogućih prijevara. Mogu se dostaviti dodatne pojedinosti, kao npr.: vrijednost originalne robe, mjesto gdje se roba nalazi ili predviđeno odredište robe, podaci za identifikaciju pošiljke ili pakovanja i ambalaže robe, očekivani datum dolaska i odlaska pošiljke, vrsta prijevoznog sredstva, podaci o uvozniku, izvozniku, primaocu ili držaocu robe.

Polje 11: Fizičko ili pravno lice navedeno u polju 1. zahtjeva mora, u svim slučajevima, biti lice koje će pribaviti izjavu predviđenu u polju 11. zahtjeva.

Polje 13: Potpisom u ovom polju, nosilac prava potvrđuje prihvatanje uvjeta iz Odluke i svoje obaveze.

Prilog 2.

**IZJAVA NOSIOCA PRAVA U SKLADU SA ČLANOM 6. STAV (1) ODLUKE O SPROVOĐENJU
CARINSKIH MJERA ZA ZAŠTITU PRAVA NOSIOCA AUTORSKOG I SRODNIH PRAVA***

.....
(naziv i adresa)

kao nosilac isključivih prava iz Zakona o autorskom i srodnim pravima i u smislu člana 4. Odluke o provođenju carinskih mjera za zaštitu prava nosioca autorskog i srodnih prava (u daljnjem tekstu: Odluka), ovom izjavom, u skladu sa članom 6. Odluke, prihvatom odgovornost za štetu koja može nastati licima koja učestvuju u nekom od carinskih postupaka iz člana 1. stav (2) Odluke, u slučaju prekida postupka pokrenutog shodno odredbama Odluke usljed mog postupanja ili propusta ili u slučaju da se za odnosnu robu naknadno utvrdi da ne povređuje moje isključivo pravo (autorsko ili srodno pravo).

Ovom izjavom se obavezujem da ću snositi i sve troškove koji nastanu u vezi sa smještajem, čuvanjem i održavanjem robe za koju su preduzete carinske mjere za zaštitu prava zbog povrede autorskog ili srodnih prava u skladu sa odredbama Odluke, kao i druge troškove koji mogu nastati u skladu sa odredbama Odluke.

Ovom izjavom potvrđujem da sam upoznat sa članom 9. Odluke i obavezujem se da ću o svim promjenama ili prestanku mojih isključivih prava po osnovu autorskog ili srodnog prava bez odlaganja obavijestiti Središnji ured Uprave za indirektno oporezivanje.

Ovom izjavom na svog zastupnika
(podaci o zastupniku)

prenosim obavezu plaćanja, u moje ime, svih troškova koji proizilaze iz preduzimanja carinskih mjera za zaštitu prava zbog povrede autorskog ili srodnih prava u skladu sa odredbama Odluke.**

Mjesto:

Datum: /..... /20.....

Potpis i ovjera nosioca prava:

.....

** - Izjava mora biti ovjerena kod notara.

** - Tekst označen pod *** unosi se u ovu izjavu samo u slučaju kada zahtjev za preduzimanje carinskih mjera za zaštitu prava zbog povrede autorskog ili srodnih prava, u ime stranog autora ili nosioca srodnog prava koji uživa zaštitu prema Zakonu o autorskom i srodnim pravima, podnese njegov zastupnik.

Prilog 3.

IZJAVA ZASTUPNIKA NOSIOCA PRAVA U SKLADU SA ČLANOM 6. STAV (3) ODLUKE
O PROVOĐENJU CARINSKIH MJERA ZA ZAŠTITU PRAVA NOSIOCA AUTORSKOG I SRODNOG PRAVA*.....
(podaci o zastupniku)

kao zastupnik stranog autora ili nosioca srodnog prava koji uživa zaštitu prema Zakonu o autorskom i srodnim pravima,

.....
(podaci o zastupanom stranom autoru ili nosiocu srodnog prava)

po punomoći

preuzimam obavezu plaćanja, u ime zastupanog stranog autora ili nosioca srodnog prava, svih troškova koji proizilaze iz preduzimanja carinskih mjera za zaštitu prava zbog povrede autorskog ili srodnih prava u skladu sa odredbama Odluke o sprovođenju carinskih mjera za zaštitu prava nosioca autorskog i srodnih prava.

Mjesto:

Datum: / /20.....

Potpis i ovjera zastupnika nosioca prava:
.....

* - Izjava mora biti ovjerena kod notara.

Ova izjava zastupnika podnosi se samo u slučaju kada zahtjev za preduzimanje carinskih mjera za zaštitu prava zbog povrede autorskog ili srodnih prava, u ime stranog autora ili nosioca srodnog prava koji uživa zaštitu prema Zakonu o autorskom i srodnim pravima, podnosi njegov zastupnik.